

修訂日期: 2004/10/22 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1352

原始資料: 蕭鎮國大德提供, 北美某大德提供

No. 1352 [Nos. 1351, 1353-1355]

佛說陀隣尼鉢經

東晉西域沙門竺曇無蘭譯

聞如是。一時佛在舍衛國祇樹給孤獨園。與大比丘眾千二百五十人菩薩萬人俱。爾時去是佛剎百千億拘利佛剎。過爾所佛土。其剎世界名阿難陀拘蠶(晉言華積)彼佛號伊迦波提羅耶(晉言最上天王)如來至真等正覺。今現在遣兩菩薩。一名阿彌陀法(晉言無量光明)二名摩訶法(晉言大光明)爾時二菩薩來到佛所。前以頭面禮佛足。長跪叉手白佛言世尊。從是間過百千億拘利佛剎。世界名曰華積。彼佛號最上天王如來至真等正覺。今現在遣我來問訊世尊。說法安隱受者增進皆無他不。得不為天龍夜叉鬼神。若薜荔若鳩洹鬼神。若羅刹鬼神若虎若狼。若人非人所燒害。彼世如來。至真等正覺。今遣我持陀隣尼鉢來。今為一切故欲令安隱。得名聲遠聞色貌端政。有氣力有筋力強如是。

闍離 摩訶闍離 闍蘭尼 郁奇目[仁-二+企] 三波提 摩訶三波提

是時佛告阿難陀言。汝受是陀隣尼鉢持諷誦讀。有佛世尊甚難得值。陀隣尼鉢亦難得聞。若善男子善女人。受持誦讀識七世生宿命。若善男子善女人。受持諷誦讀。一切鬼神人非人蛇虵蝮蠍。皆不能害。毒不能中。蠱道為不行。不為刀兵所傷害。帝王不能得其便。梵不恚之。如是阿難陀。是陀隣尼鉢七十七億諸佛所說。若有中害者。是諸佛語為無有異。阿逸多菩薩字彌勒。語賢者阿難陀言。我亦當復說陀隣尼鉢。所以者何。亦欲令一切安隱。有名聲德遠聞。色貌端政饒益力。其筋力強如是。

頽耆 跋耆 滅支叉離 勒支 羅嵐彌 漏嵐彌 醯離 彌離 提離 爾時佛告

阿難陀言。汝受是陀隣尼鉢持諷誦讀。有佛世尊甚難得值。是陀隣尼鉢亦難得聞。若善男子善女人。受是陀隣尼鉢奉持諷誦讀。識十四生宿命。若善男子善女人。奉持陀隣尼鉢諷誦讀說。終不為一切鬼神人非人所觸燒。蛇虵蝮螫諸含毒之蟲所不能害。毒不能中。蠱道為不行。刀兵不能傷。帝王不能得其便。梵釋四天王所共擁護。阿難陀是陀隣尼鉢。八萬四千億佛所說。佛告阿難陀言。我亦欲復說陀隣尼鉢。欲令一切安隱。有名聲德遠聞。色貌端正饒氣力。其筋力強如是。

頽耆 跋耆 涅耆 鳩涅耆 鐵離 抄羅波提 安那波提 般那波提 迦前尼摩訶前尼

是時佛告賢者阿難陀言。受是陀隣尼鉢。持諷誦讀為一切廣說。若善男子善女人。受是陀隣尼鉢持諷誦讀。識無央數生宿命。是陀隣尼鉢。阿難陀不可稱計億佛所說

。如是阿難陀是陀隣尼鉢。若行道若為賊若為虎狼。若水中若犯帝王縣官事。當念是陀隣尼鉢諷誦讀持。是陀隣尼鉢。阿難陀繫著枯樹即便生葉華實。何況為人說病不愈。當為一切病人呪。佛說經已。賢者阿難陀及諸會者。皆歡喜受行。

佛說陀隣尼鉢經